

Paw Ghoing Ka Kraung Pui

Don't Avaricious



Paw Ghoing Ka Kraung Pui

Don't Avaricious

Cao tiem lih : Samlao Pao

Cao Pawd Riieng : Sai Rong Khun

Lox Lai Shiao : Lai Vax

Bawg Plih Lih : Bawg (1)

Khix Num : 9 /2021

Author : Samlao Pao

Illustrator : Sai Rong Khun

Original Language : Wa

Edition : First Print

Date : Sep /2021

Wa, Parauk

Myanmar

Copyright © 2021, Literature Department Of WBCm SIL

For permission to reuse, contact the copyright holder.




Didix koe yaong pang piang Gawng Lang
tix yaong, yaong an singai khaing veng heue.
Toi yaong Gawng Lang tan koe nong ting mai
totiag ku ceu heue. Daux yaong nyiex ma pui
khawm uik kix koe moi heue. Pui yaong an kix
yaox ti rien ka pui priex moi mai totiag hai pa
hoek teei ih moi heue. Daux yaong an koe nyiex
ma Tax Khri nawh koe kawn simex iak (5)num
tix kaux mai koe moi tom nie heue.



Tix ngaix kawn Tax Khri ot ti yiem mawh yiem nawh jao patix miex keeing ang tawng heue. Miex keeing nawh kiex dah rhawm kheu ang lai chix yuh kawn tix yien lox yiem heue. Yam an sivai ting tix mu pa sang teei ih mio koe greem nyiex kix heue. Tax Khri ah "Phan maix ang cu yien lox yiem aux kok sivai ting hoek ih ka maix kieh" nan ka kawn tix heue.



Jao lox Tax Khri kawn nawh ah "Aux ang lhak ka sivai ting ang lhat ceex kawx" nawh baox yiem heue. Tax Khri meet rhawm "Phan maix ang lhat ka sivai maix lhat ka patix?" ah ka kawn nawh heue. Kawn nawh "Aux ang lhat ka titix ceex kawx aux lhat ka Yag ngie" ah ka keeing nawh heue. Miex keeing kawx kiex ang tie tawng Yag pa ah kawn, sivai ting pa sang teei moi kawx dao am ka mhong Yag heue. Yam an pui briex ra kaux koe greem nyiex kiex dao am ka grawng Yag heue.



Pui briex kiex chawng Yag ka paox kawx kiex ang tawng heue. Yam an kiex doh keud ka lox tawm moeng tix "Phang ang viex moi tix mu ang chix, laug ceu pa ngaing jheeh mawh moi pa mhawm" ah nan heue. Khaix an pui briex tat rhawm ti yuh pon briex moi mai kiex jah pupi jheeh moi heue. Kiex ang yaox pa ngaing jheeh kiex yaox koe ka daog nyiex tix mu mai kiex hu pupi jhak heue. Kheu ngaing jheeh moi an kiex vien ka maox kaux mai kiex briex ing heue.



Pui briex pak pa tuk ti mawh moi, kiex kied gaux rhawm khawm tuk viex ing daux faik heue. Sivai ting kawx pak pui briex ra kaux an mawh Yag mai nawh hawt khaix tuk kiex heue. Pui briex tuk sivoe tix kaux mai hawt ti siviet plak khaix tix kaux kiex hu krax leeing sawm heue. Yam lih riang praix ceeix pui hawt plak khaix nawh tawng pa briex kiex ang mawh moi heue. Viang mawh nan mawh patix nawh ang sidawng nawh keud ti mawh Yag mai ang lai cu hawt khaix kiex heue.



Yam hoek riieng praix pui briex pa tuk maox chawk paox laux tivud heue. Kheu nawh ang mhong lox paox kawx nawh vien maox tuk ti ka khaox ruh heue. Yam jhak pui briex ka pa tuk ti nawh yaox mawh sivai ting mai nawh kied lhat ka heue. Sivai ting an kheu cuk khaox ka jheeh lih nham, pui briex pak sivai ting an hoik ih ka paox grawm nawh heue.



Pui briex kied lhat mai nawh niyet ti haok ot piang khaox ruh heue. Yam hoek pui briex piang khaox ruh nawh yo lox "Eeu . . totiag uik eue. . Sivai ting pa tawx pex yaox krax kha rhawm aux hoik vien nawh tin niyet hoek pex pah nawh yum" ah nan heue. Khaix rheeng yo nawh lox totiag kix hoek mai ah nin "Kapiang khaox an mawh patix lie? Nawh pex vien sivai ting in yuh ka mawx lie?" kix chawk ka paox mai kix daox am kah heue.



Kadaux totiag ankix krih tix mu haok piang khaox ruh mai sang jhak ka pui briex pa ot piang khaox heue. Krih keud vaid giex pui briex mawh sidax, nawh haok sipeet vaid an ka taix tix heue. Pui briex kied lhat mai bluh vaid nawh vaid an pat ka taix krih heue. Kheu kied saux taix krih, krih lhat mai yo lox "Wu wu. . wuwuwu . ."ah nan mai niyet ti ih khaing khaox ruh heue.



Mawh jao lox yo krih pui briex kied lhat ang lai pon giex khaaox nawh rau khaing piang khaox heue. Pui briex rau ah "Bong" plak toi sivai ting mai yum tan heue. Sivai ting pak mawh lih Yag ti ih ka nawh, sivai kied lhat ang lai jhak titix heue. Sivai ting an sau riiang son poek khaing maox vien mai tut yuh maox vien heue. Khaix an sivai ting niiet to luan dee singai heue.



Kheu pat vaid ka taix krih tom yam in taix krih koe kaix mat vaid tete heue. Mawh kheu coca sivai ting ti sang luan khaing krax yum nawh sau riang ka tut maox vien khaing khaox ruh heue. Jao ting riang sivai khaox ruh ang lai koe loik mhawm, ging ti yaox tom hoek yam in heue. Pui pa ghoing rhawm ka kraung cie pui, tag ang yaox ot klawd ju im ju mai paox nyiex tix heue. Mawh kheu nan paw ghoing ka kraung pui awx.

